

EDITORIAL

Magpursige ha pag-ato ha pakuri, pasista ngan papet nga rehimen Marcos

Ha katapusan han bulan, matindog hi Ferdinand Marcos Jr ha atubangan han Kongreso agud utro nga uwaton an katawhan hiunong ha mga "nahimo" niya ha naglabay nga tulo katuig. Damo ura-ura an ginhihimo niya nga buwa kundi diri niya matatahuban an waray tubtuban nga pakuri nga nahiaaguman han katawhan ha ilarum han iya paghahadi. Waray hunong an tigda nga pagluros han lebel han kinabuhi han mayoriya han katawhan. Waray katupong an korapsyon han pamilya Marcos. Buta an iya pagsunod ha dikta han amo nga imperyalista nga US. Tikagrabe an pampulitika nga panmuypoy kontra ha katawhan nga natindog ngan naato.

Dara ni Marcos an dugang nga pag-inantos ha ordinaryo nga katawhan. Paras-anon pa gihapon han katawhan an hitaas nga presyo han bugas, nga diri matahuban han mapan-uwat nga pagparayaw ni Marcos. Kakunsabo hi Marcos han mga kompaniya ha lana ha tigda nga paghitaas han presyo han diesel ngan gasolina. Ha luyo han hiluag nga panawagan, gin-ulang han Malacañang an proposisyon nga ₱200 nga umento ha inadlaw nga suhol han mga trabahador, ngan lugod, dugang pa nga buhis an iginpasugbong ha katawhan. Wala-tuo an taranggalay ha trabaho, hiluagan an disempleyo, narunapulo kayukot an napipiritan nga magpakabuhi ha iba nga nasud, samtang ga-

tus-gatos kayukot nga mga kabras an ginpapalayas ha ira puruy-anan, ngan waray wantas nga gin-aagawan han tuna, pangisdaan ngan mga surok han pakabuhi.

Iginpapatuman niya an mga pali-siya ngan programa nga dugang nga nagpapabuy-ay ha mga langyaw nga dagko nga kapitalista, ngan mga kakunsabo nga dagko nga kumprador burgesya, agaron maytuna ngan burukrata kapitalista. Wala-tuo an pan-ngungutang ni Marcos nga diri naman napapahimulsan han katawhan, kundi nahingangadto la ha parayaw nga mga proyekto nga pan-imprastruktura nga ginkukuhaan han kikkab ni Marcos ngan

mga korap niya nga upisyal. Gatus-gatos kabilyon kapisos nga kinawat nga karikuhan han mga Marcos an nahibalik ha ira kontrol, samtang gatus-gatos kabilyon kapisos an ginbahakin ha porma han Maharlika Investment Fund, *confidential* ngan *intelligence funds* ni Marcos, ngan ginmalmagastar ha sobra-sobra nga gastos ha militar, ha kahibangan han ginkikinahanglan nga mga pankatilingban nga serbisyo.

Sugad han nakalabay nga mga rehimen, ginpapaburan ni Marcos an dagko nga langyaw ngan lokal nga kapitalista agud makahakin hira hin maksimum nga ganansya. Ginraraysang ni Marcos an suhol han mga trabahador samtang gin-iibanan hin buhis an mga kapitalista. Ginlugwayan niya an langyaw nga pananag-iya ha tuna ha Pilipinas (ha tahub han balaud nga nagtutugot ha 99 katuig nga "pagplete"), ngan gintanggal an mga pankalibungan nga regulasyon agud waray ulang nga dambungan ngan rub-on an natural nga karikuhan han nasud.

Gintatagan hira ni Marcos hin armado nga proteksyon han militar ngan pulis, nga gin-gagamit ha pagpuy-poy ha katawhan nga nagdedepensa ha ira tuna ngan pakabuhi. Ha kasyudaran, ginpupuntirya han mga pasista nga alipures han reaksyunaryo nga estado an mga tra-



bahador nga nag-uunyon ngan natin-dog para ipakigbisog an ira mga de-manda nga umento ha suhol. Gin-gagamit ni Marcos an NTF-Elcac ngan an "Anti-Terrorism Law" ha pagpuy-poy ha mga katungod han mga traba-hador, бага-trabahador, kabatan-u-nan-estudyante, parupangisda, ka-babayin-an ngan iba pa nga demok-ratiko nga sektor agud pugngan hira nga mag-organisa ngan pumartisipar ha kagiusan para ha pankatilingban nga pagbabag-o.

Ha kabaryuhan, butaray an tero-rismo han estado ha pag-imponer han balaud militar ha mga barangay ngan komunidad, nga ginsesering han NTF-Elcac nga nasuporta ha armado nga rebolusyunaryo nga kagiusan. Wala-tuo an ekstrahudisyal nga panmatay, panhadlok, panhalikwat ha kababla-yan, ilegal nga pangaresto, "pagpasu-render," waray wantas nga pagpabu-to han pusil, panganyon ngan panhu-log han bomba ha mga uma ngan bu-kid hirani ha mga komunidad. Bata man o kalagsan, waray ginpipili nga biktima an brutalidad han mga pasis-ta nga tawuhan ni Marcos. Pinaka-madarahug an panmuypoy han rehi-men Marcos ha mga tay-aw nga bar-yo ngan sityo han mga parag-uma ngan minoriya nga katawhan, nga gin-aagawan han tuna han mga

langyaw nga kompaniya ha pagmi-mina, mga plantasyon, proyekto nga pan-enerhiya ngan eko-turismo.

Gin-gagamit ni Marcos an islo-gan han "kamurayawan" agud tahu-ban an gerra han pagpuy-poy hini ha patriyotiko ngan demokratiko nga kagiusan han katawhan Pilipino. Ini an hingyap han mga imperyalista ngan naghahadi nga klase nga "ka-murayawan" nga mamingaw an mga tinalumpigos ngan tiniyupi. Diri ini an makatadungan ngan panmaihaan nga kamurayawan nga hingyap han katawhan, nga makakab-ot la pinaa-gi han pagbaton ha ira batakan nga mga demanda para ha libre nga distribusyon han tuna, nasyunal nga industriyalisasyon, tinuod nga ka-talwasan ngan demokrasya.

Ha duso han amo nga imperya-lista, iginsugo ni Marcos nga papin-tason an gerra agud kunuhay perdi-hon an Bagong Hukbong Bayan. To-do-larga an pakigkonsabuhay ni Marcos ngan han AFP ha pwersa mi-litar han US ha pagpupwesto hini han mga tropa, sarakyan ngan armas ha Pilipinas, ngan ha paglansar han susrunod nga mga pagpahira ha gerra nga nakatarget ha China. Im-bes nga tagan-dalan an murayaw nga dayalogo ha China, ginpapaso gud han rehimen Marcos an armado nga

tensyon ha South China Sea.

Waray malalauman an kataw-han Pilipino ha pakuri, pasista, ngan papet nga rehimen Marcos. Sam-tang nakalingkod hi Marcos ha Ma-lacañang, gagamiton niya an iya po-der agud dugang nga dambungan an baul-karikuhan han katawhan, pahi-lawigon an iya poder, ngan makig-asdangay ha iya mga karibal ha pu-litika. Waray iba nga makakadtuan an katawhan kundi an tumindog ngan atuhan an rehimen US-Marcos.

Kinahanglan pahiluagon ngan padig-unon han katawhan an ira or-ganisado nga kusog. Ha kasyudaran, kinahanglan bug-os-kusog nga butu-kon an mga trabahador, бага-traba-hador ngan mga kabatan-unan-es-tudyante, komo sararigan han kusog han iba pa nga mga demokratiko nga sektor. Kinahanglan parayhakon an mga demokratiko ngan kontra-im-peryalista nga panmasa nga pakigbi-sog ha mga pabrika, komunidad ngan mga eskoylahan.

Ha kabaryuhan, kinahanglan pakusgon ngan pahiluagon an hukbo han katawhan ngan an mga sanga ngan komite ha seksyon han Partido agud bug-os-kusog nga tukuron o utro nga tukuron an mga asosasyon han parag-uma agud magdependa kontra ha pasismo, ngan agud ipa-sulong an mga pakigbisog kontra ha mga pyudal ngan bagapyudal nga paniniyupi, ngan pakusgon an guliat para ha tinuod nga reporma ha tu-na. Kinahanglan parayhakon an paglansar han mga taktikal nga opensiba ngan ispesyal nga opera-syon agud sirutan an pinakalunod-patay nga pasista ngan tumanon an gindedemanda nga hustisya han ka-tawhan.

Waray iba nga kaangayan nga baton an katawhan Pilipino kundi an pagpaparayahak han kagiusan masa ngan armado nga pakig-away agud atuhan an pananalumpigos ngan panmuypoy han rehimen US-Marcos. Ha waray kasumo nga pag-pupursige ha dalan han pakigbisog, seguro nga mapapagbaton hi Marcos ngan aatubangon an pag-husga han bug-os nga katawhan. **AB**



Tuig LVI Ihap 13 | Hulyo 7, 2025

Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles.

Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.

Gin-uunod

Editorial: Magpursige ha pag-ato ha pakuri, pasista ngan papet nga rehimen Marcos 1

Kagiusan nga pagtutul-id ha Southern Tagalog 3

Plano nga pabrika han bala han US, gintipahan 4

Mapanwakay nga kwari, ginparalisa han BHB 4

Mga protesta 4

Proyekto nga SCMB Railway ngan LEC para ha US 5

Militante nga kawsa han Pride March ha Pilipinas 6

Ha dagmit nga pulong 7

Pabug-at nga buhis ha katawhan 8

Bagapyudal nga pananalumpigos ha parag-uma 9

Panmatay ha mga sibilyan ngan *hors de combat* 10

Tinuod nga kamurayawan, iginpanawagan 10

Gios protesta han katawhan nga Kenyan 10

An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas

 ang.bayan@cpp.ph

Kagiusan nga pagtutul-id ha Southern Tagalog: Itanum ha kasingkasing an teorya, mahibaro ha kalugaringon nga praktika

Ha butnga han waray lat-ang nga mga operasyon militar tikang 2024, madinaugon nga iginlansar ha usa nga prente gerilya ha Southern Tagalog an usa nga kumperensya ha buruhaton masa ngan buruhaton militar. Prinsipal nga katuyuanan han katitirok han mga yunit han Bagong Hukbong Bayan (BHB) an magsuma ngan magsarusaruy han mga ekspersyensya agud mas maupay nga maatubang an natikagrabeng kampanya nga panrumok han Armed Forces of the Philippines (AFP) ha subrehiyon. Pinartisipar hini an magkasalado nga kalagsan, namumutnga ngan barubata nga kadre. Lahos katunga han pinartisipar kabatan-unan.



Mag-aram, magtul-id, magpasulong

Gin-abrihan an kumperensya han pag-aram ha duha nga *case study* ha buruhaton masa. Ginkuha ini ha ekspersyensya han duha nga yunit han Hukbo ha sumobra-kumulang usa ka-tuig. Mayor nga punto nga ginhisgutan an manera han mga yunit ha buruhaton masa: an pagbalanse ha buruhaton ekspansyon ngan konsolidasyon, ngan an kaihaon han pagbase han mga yunit ngan distansya hini ha mga lugar diin may konsentrasyon han masa. Matarum nga gintudlok an konserbatismo ha buruhaton masa ngan pagkamayda paborito ha mga base nga igintutul-id yana.

Gintudlok an yawe nga papel han buruhaton edukasyon, propaganda, kultura ngan buruhaton medikal ha epektibo ngan natuhop nga buruhaton masa. Usa nga maupay nga pananglit-an hini an pagbug-os han usa nga iskwad hin praymer ha usa nga bungto nga naghuhulagway ha presente nga sitwasyon ngan problema han masa hasta na an rikohanon nga rebolusyunaryo nga kasaysayan han bungto tikang ha pankatilingban nga imbestigasyon. Epektibo nga nagamit an praymer agud butukon an masa ngan tukuron an mga grupo ngan tsapter han mga rebolusyunaryo nga organisasyon masa ha nasering nga bungto.

Iginpunto liwat an importansya han pagpartisipar han Hukbo ha produksyon han masa ngan paghatag ha ira han panmedikal nga serbisyo ha

buruhaton masa. Ha mga positibo ngan negatibo nga ekspersyensya nga iginsering, linandaw an mapagdesisyon nga papel han tukma nga pamumuno han Partido ngan an madig-on nga pagkakaurusa agud mahiabante han Hukbo an buruhaton masa ha luyo han mga buko, kakurian ngan pabarubag-o nga sitwasyon. Kahuman han paghisgot ha mga *case study*, ginrebyu an "Mga Batakan nga Prinsipyo ha Buruhaton Masa ha Kabaryuhan."

Sunod nga iginpresentar ngan ginhisgutan an mga *case study* ngaduha han madinaugon ngan pakyas nga taktikal nga opensiba hasta an pira nga mga depensiba nga agway. Ginpalandaw ha mga *case study* an importansya han buruhaton paniktik ngan pag-oorganisa ngan pagpapagios ha masa para hini nga buruhaton.

Sugad ha buruhaton masa, landaw ha mga *case study* an panginanglangan ha absoluto nga pamumuno han Partido ha Hukbo agud pahugton ang pagkakaurusa anuman nga sitwasyon an atubangon. Kun waray an sugad nga pamumuno han Partido, diri mahihimo an maupay nga pagdepensa kontra ha kaaway ngan pagrurumok dinhi nga amo an prinsipal nga buruhaton han Hukbo. Kahuman ginadman an "Mga Karukayaknon ha Estratehiya ha Rebolusyunaryo nga Gerra han China" ni Mao Zedong.

Ha rubas han pagsuma han mga ekspersyensya ha buruhaton masa ngan militar ngan pagrurumok ha teorya

hiunong hini amo an pagkatin ngan pagpahilarum han mga kadre ha ira pagsantop ha mga batakan nga prinsipyo han ginerilya nga pakiggerra ha balitang han estratehiko nga depensiba ngan ha kamutangan nga utro nga nagpapanibag-o nga kusog an BHB tikang ha pag-atras nga iginbunga han mga pansakob nga kaluyahan ngan ha pag-atubang ha atake han kaaway.

Naglansar hin kapehan ha pira nga sesyon ha gab-i diin iginpasaro an ekspersyensya ha pagpapapultaym han kabatan-unan nga parag-uma, nasyunal nga minoriya ngan kabatan-unan-nga-intelektwal. Naghatag ini hin mga bulawan nga leksyon ngan inspirasyon kun tiunan-o parayhakon an pagpapaapi ha BHB ngan kun tiunan-o padig-unon ngan pauswagon an mga Pula nga mangaraway ha butnga han gitgitay nga pakig-asdagay ha kaaway.

Agud gamuton ha ideolohiya an mga kaluyahan ngan problema, ginadman liwat an "Ispesyal nga Kurso ha Empirisismo" ngan "Hiunong ha Praktika" ni Mao. Gintumuyo hini nga epektibo nga puntiriyahon an empirisista nga tendensiya han panhunahuna ngan pagtrabaho nga iginpakita ha mga *case study*. Partikular nga nawong hini an kakuntento ha burublag nga datos hiunong ha kamutangan ngan pakabuhay han masa, hamabaw nga pag-aram ha rebolusyunaryo nga kasaysayan han mga erya ngan hilaw nga paniktik. Klaro ha ekspersyensya

Sundan ha paypay 4

Plano nga pabrika han bala han US, dirudiretso nga war games, gintipahan

NAGPAHAYAG HIN PAGTIPA ngan kabaraka an magkalain-lain nga grupo kontra ha proposisyon ha Kongreso han US nga magtindog han pabrika han bala ha Subic Bay, Zambales. Sering nira, hulga ini nga plano ha nasyunal nga seguridad ngan makakaapekto ha pakabuhi han mga parupangisda ha Zambales.

Linutaw an plano nga pagtindog han pabrika ha usa nga report han US House Committee on Appropriations nga iginsapublikar hadton Hunyo 24.

"Ha kasaysayan, diri an katunaan han US an nagigin direkta nga target han mga kasumpaki hini nga nasud, kundi an mga base militar ngan mga satelayt nga base hini ha iba nga lugar," sering han Pamalakaya.

Ginsukna naman han Kilusang Magbubukid ng Pilipinas (KMP) an iginlansar han US nga Operation Lightning Strike war games hadton Hunyo 30 ha Palayan City, Nueva Ecija ilarum han Salaknib Phase 2. Ginpabuto hini nga war games an duha nga High Mobility Artillery Rocket System (HIMARS) ngan gumamit hin upat nga Apache attack helicopter.

Sering han grupo, peligroso ini nga mga war games ha mga komunidad han parag-uma, labina an live-fire missile test. Natuod an KMP nga diri ini para ha depensa o kamurayawan kundi kaparte han pangandam han US para ha gerra.

Samtang, nagmartsa ha Sydney ha Australia an mga Pilipino ngan Australian hadton Hunyo 22 komo pagsukna ha iginlansar nga Pilipinas-Australia Kasangga war games. Duha kabeses kada tuig nga iginlansar tikang 2023 an Kasangga diin libre nga nakakasulod an mga tropa nga Australian ha teritoryo han Pilipinas.

Tikang ha paypay 3

han prente nga an diri pagkumpleto ngan kakulangan ha pagbubug-os han pankatilingban nga imbestigasyon ngan pag-analisar ha klase (SICA) nagbubunga ha mga diri haum nga palisiya ngan programa ha pulitika ngan mga panmilitar nga plano.

Ha paghuman han kumperensya, gin-aruan an mga pinartisipar han ira mga repleksyon. Sigon kan Ka Lima, "Kinahanglan igsalikway an suhetibismo ngan indibidwalismo ha kada hibla han aton pagkatawo, an arogansya, an pagigin kampante ha ngatanan nga aspeto. Masayon gud la ha yakan, kundi ayat gud ha aktwal. Bag-uhon naton an pamaagi han pagpinsar agud magin baltok an aton pag-analisar ha mga butang ngan magin eksakto an mga pitad naton ha pagsolbar ha mga problema."

"Umato agud magpakusog! Magpakusog samtang naato!" Ini an panawagan han kagiusan nga pagtutul-id ha mga rebolusyunaryo ha Southern Tagalog.

Ha luyo han aatubangon nga sitwasyon militar, hitaas an diwa han mga Pula nga kumander, giya pampulitika ngan mangaraway han magburublag an mga yunit para ha mga panibag-o nga buruhaton nga igintalaan han kumperensya. Klaro an ayat para ha Partido ngan Hukbo ha presente nga kritikal nga takna han rebolusyunaryo nga kagiusan: Sugbungon an tikadamo ngan tikadako nga mga buruhaton ngan sakripisyo hin may diri nagpapapas nga diwa han pagse-serbe ha katawhan ngan pagtapod ha katukmaan ngan pagdadaug han rebolusyon.

AB

Mapanwakay nga kwari, ginparalisa han BHB-Negros

GINPARALISA NGAN GINSUNOG han Bagong Hukbong Bayan (BHB)-South Central Negros (Romeo Nanta Command) an duha nga dump truck ngan usa nga backhoe nga gin-gagamit ha mapanwakay nga operasyon nga kwari ha Sityo Medel, Barangay Carabalan, Himamaylan City, Negros Occidental hadton Hulyo 4. Inabot ha ₱11 kamilyon an danyos ha operasyon.

Iginpatuman ini han BHB komo pagprotekta ha komunidad ngan kalibungan tungod kay maiha na nga nanmemerwisyo an kwari. Tungod ha kwari, naapektaran an mga uma ngan pakabuhi han mga residente nga nakasariig ha salog.



Paggios ha ika-3 katuig ni Marcos. Nagmartsa hadton Hunyo 30 tipakadto ha Mendiola ha Manila an mga nasyunal-demokratiko nga organisasyon agud suknaon ngan sukton an rehimen Marcos ha okasyon han ikatulo katuig hini ha poder. Ginsukna nira an pagpapakaniyutiyo han rehimen ha imperyalismo nga US, pakuri nga mga palisiya, pasista nga panmuypoy ngan waray pulos nga mga palisiya. Kapareho nga protesta an iginlansar ha Baguio City ngan Iloilo City.

Piket kontra taranggalay ha SkyCable. Nagpiket an SkyCable Supervisors, Professionals/Technical Employees Union (SSPTEU) hadton Hunyo 24 ha atubangan han kompaniya ha Quezon City agud tipahan an taranggalay ha SkyCable Corporation. Diri mamenos ha 133 nga membro han unyon an posible nga patalsikon ha trabaho, labot pa ha mga trabahador nga diri kaapi ng unyon.

Pagtipa ha demolisyon ha mga floating house ha Cavite. Nagprotesta an mga parupangisda nga kaapi han Pambansang Lakas ng Kilusang Mamamalakaya ng Pilipinas (Pamalakaya) ha baybayon han Bacoar City hadton Hunyo 24 agud tipahan an hulga nga demolisyon ha ira mga balay nga nakatindog ha dagat. Gintatantiya nga masobra 100 kapamilya an mapapalayas ha demolisyon. An demolisyon kasumpay han plano nga 420-kaektarya nga reklamasyon nga proyekto han Frabelle Fishing Corporation ngan han lokal nga gubyerno.

Proyekto nga SCMB Railway ngan LEC, magseserbe ha interes han imperyalismo nga US

Ginpirmahan hadton Hunyo 26 han rehimen Marcos ngan han US Trade and Development Agency (USTDA), an kasarabutan para ha pagpapautang han gubyerno han US hin \$3.8 kamilyon para ha patikang nga pangaliskay ngan pag-aram ha proyekto nga Subic-Clark-Manila-Batangas (SCMB) Railway. Katuyuanan han proyekto nga magplastar han sistema han riles para ha transportasyon han mga epektos para ibanan kuno an pagsuruot ha duongan han Manila.

Ha kahilab-on nga 250 kilometro, igsusumpay han SCMB Railway an Subic ngan Clark, tahos ha National Capital Region tubtub ha duongan han Batangas. Basar ha plano han USTDA, magtitikang ha 2027-2028 an konstruksyon han parte han Subic-Clark, ngan ha 2028-2029 an konstruksyon han parte han Clark-Manila-Batangas. Target hini nga tikangan an operasyon han riles ha temprano nga parte han 2030. Gintantiya nga aabuton hin \$3.2 kabilyon an balor han bug-os nga proyekto.

Syahan nga igintanyag han rehimen Duterte an proyekto nga riles giutan han Subic ngan Clark ha gubyerno han China hadton 2016. Nag-saad an China hadton 2018 nga popondohan ini kundi ginbawi ini hadton 2022. Ha paglingkod han rehimen Marcos ha poder, utro hini nga ginbuhi ngan ginpahilaba tubtub Batangas ha sulsol han US.

Iginpailarum ini nga proyekto ha gin-ngaranan nga Luzon Economic Corridor (LEC), usa nga trilateral nga programa giutan han US, Pilipinas, ngan Japan nga nagtutumuyo nga padagmiton an pagtambak han ira kapi-

tal, tawuhan ngan higamit ha porma han mga proyekto nga pan-imprastruktura ha *renewable energy*, duongan, erport, tulay ngan kalsada. An LEC an syahan nga proyekto han Partnership for Global Infrastructure and Investment han US ngan yawe nga parte han estratehiya hini ha Indo-Pacific kontra ha China, partikular kontra ha Belt and Road Initiative hini.

Labot ha SCMB Railway, iginpailarum liwat ha LEC an 27 nga iba pa nga proyekto nga imprastruktura kalakip an pagpapahiluag han Clark International Airport, Bataan-Cavite Interlink Bridge, Subic Bay (Redondo-Ilanin) Bridge, Central Luzon Link Expressway, North Luzon East Expressway, Laguna Lakeshore Road Network Development, Kalaanan Irrigation Project, North-South Commuter Railway, New Clark City Extension Railway ngan Southern Batangas Airport.

Titindugon an SCMB Railway ngan iba pa nga imprastruktura para ha gamit han mga langyaw nga kompaniya, sugad han mga kompaniya nga Amerikano ha pagmamanupaktura ngan baterya nga karuyag magpulos ha riko nga rekurso han *nickel, cobalt, copper* ngan *bauxite* han Pilipinas.


Target han US, kabakyang an Japan ngan mga nasud nga NATO,

nga magbuhos hin tubtub \$100 kabilyon nga kapital ha masunod nga 10 katuig. Kadak-an hini nga pondo magigin ha porma han utang ngan pribado nga kapital, nga iglilibre ha pagbubuhis ngan waray direkta nga sumpayan ha lokal nga ekonomiya.

Kadungan hini nga mga katuyuanan ha ekonomiya, an SCMB Railway ngan an iba nga proyekto ilarum han LEC mayda klaro nga militar ngan heyopulitikal nga katuyuanan. Igsusumpay han SCMB Railway ngan han *network* han mga tulay ngan sigad an dagko nga "EDCA site" o mga base militar han US ha Luzon, ngan pasasayunon an pagbarubalhin han mga armas, tawuhan ngan militar nga sarkyan dinhi. Pasasayunon liwat hini an militar nga transportasyon ha iba pa nga parte han Luzon. Samtang, an pagpahiluag ha erport ha Clark magseserbe ha mga pan-gerra nga edro han US, nga yana mayda na higuag nga hangar ngan paradahan ha kasapit nga Basa International Airport.

Mas klarado an militar nga katuyuanan han LEC ha diri pala maiha nga anunsyo han Kongreso han US nga plano nga pagtindog han pabrika han bala ha sakob han Subic. Antes hini, nagplete na hin dako nga bodega an US ha Subic agud ipusisyon an higamit militar nga kunuhay kaparte han pangandam ha mga kalamidad.

Gawas han Pilipinas, kaparte an LEC ha mas hiluag nga estratehiya han US para pugngan an natikahiluag nga impluwensya han China ha Southeast Asia. Bisan kun nagpabilin nga dominante an pamumuhunan han US ha rehiyon, damo nga nasud dinhi an mas nakarawat han pamumuhunan han China para ha dagko nga proyekto ha imprastruktura, pagmamanupaktura ngan pagmimina, ngan ha sugad diri nagseserra ha heyopulitikal nga mga katuyuanan hini. Diri sugad han Pilipinas, nalikay an mga nasud ha ASEAN nga mahigot ha eksklusibo nga panmilitar nga alyansa ha US.



Gakuson an militante nga kawsa han Pride March ha Pilipinas

Iginpapalaypakay an mga balangaw nga bandera ngan taas-kamao nga nagmartsa an gatus-gatos nga membro han sektor han LGBTQ+, mga alyado ngan progresibo nga grupo hadton Hunyo 26 ha Stonewall Philippines Pride March nga ginhimo ha Recto Avenue, Manila. Nakiggitgitay hira ha mga pulis agud ig-insister an paglalansar han programa ha Mendiola.

Ha pangunguna han nasyunal-demokratiko nga grupo han mga LGBTQ+ nga Bahaghari, ginbug-os han mga pormasyon nga Pride (nag-sasalin-urog ha bulan han Pride) an Stonewall Philippines. Pormal nga igindeklara han bag-o nga asosasyon an tinuig nga pamumuno ha militante nga mga aktibidad ngan martsa para ha Pride kada Hunyo.

Pagsaludo ngan pagsakinabuhi an Stonewall Philippines ha pinakasayanan nga Pride March ha Pilipinas ngan bisan ha Asia—an Stonewall Manila nga iginlansar hadton Hunyo 26, 1994 ha Quezon City. Ginpangunahan an militante nga martsa ngan mitsa han pira kadekada nga pakigbisog han LGBTQ+ han Progressive Organization of Gays in the Philippines (ProGay), kabakyang an Metropolitan Community Church (MCC).

Kadungan han panawagan kontra ha diskriminasyon ha LGBTQ+ ngan pag-undong ha mga katungod han sektor, tumindog hira hadto kontra ha pakuri nga Value Added Tax (VAT), paghitaas han presyo han lana ngan papliton ngan iginbuksas an mga kontra-katawhan nga palisiya han hadto rehimen US-Ramos.

Trenta y uno katuig an nakalabay, iginpapanawagan yana han sektor an pagsasabalaud ha SOGIE Bill, makaburuhi nga suhol, trabaho, tinuod nga reporma ha tuna ngan nasyunal nga industriyalisasyon, ngan naglulugaring nga pan-gawas nga palisiya, katalwasan para ha Palestine ngan mga nasud nga gintatalumpigos han US. Ginpasidunggan nira an mga martir han sektor han LGBTQ+ nga nagserbe nga mga organisador ngan aktibista sugad kanda Alex Dolorosa, Chad Booc, Ryan Hubilla, Ali Macalintal ngan damo pa nga iba.

Pumartisipar ha nasyunal demokratiko nga rebolusyon

Nagpahayag han pakig-usa ngan pagpasidungog an Makabayang Kilusan ng Bagong Kababaihan (Makibaka) ha sektor han LGBTQ+ ha pagsalin-urog han Pride hadton Hunyo. Gin-aghat han grupo an sektor nga makig-urusa ngan direkta nga pumartisipar ha nasyunal-demokratiko nga rebolusyon nga tinuod ngan diretso nga maghahawan han dalan para ha hul-os nga pagtalwas han LGBTQ+ kaupod an katawhan nga tinallumpigos ngan tiniyupi.

Kasumpay hini, nagpahimatngon an grupo nga magin mabinantayon ha pananabotahe ngan panguwat han imperyalismo ngan ngatanan nga reaksyon ha pakigbisog han LGBTQ+ ngan pagsalin-urog ha bulan han ng Pride. Sigon ha Makibaka, ginpapatarapsaw han imperyalismo an pagsalin-urog agud ipahirayo an LGBTQ+ ha pakigbisog kontra ha diskriminasyon, ngan nasyunal nga pananalumpigos ngan paniniyupi.

Ginsisingabot han dagko nga korporasyon ngan mga pulitiko an pagsalin-urog ha Pride. Samtang iginpapatuman hini ngan han imperyalista nga US an baga-patron nga Pride, padayon an pagpapabilin han mga balaud ngan palisiya ha ekonomiya ngan pulitika nga dugang nga naglulubong ha mga LGBTQ+ tikang ha masa nga anakbalhas ha ruyonduyon han kawaray trabaho o disente nga trabaho ngan nagduduso ha ira ha mga kontra-sosyal nga mga aktibidad agud mabuhi.


Usa nga ladawan hini an "rainbow washing" o "rainbow capitalism." Nanangahulugan ini han paggamit ha mga simbolo ngan pulong han sektor han LGBTQ+ agud kumita hin mas dako an mga korporasyon.



Nanawagan gihap an grupo nga magin kritikal an Pilipino nga mga LGBTQ+ ha pankultura nga opensiba han imperyalista nga US ha hunahuna ngan higwaos han masa. Iginpapasamwak han imperyalismo an burges-dekadente nga kultura sugad han sayop nga suklanan han kama-husay ngan iba pa nga suklanan han pagin LGBTQ+. Iginpapalandaw gihap hini an indibidwalismo ngan *hypersexuality* (sobra nga pagpatakas ha sekswal nga aktibidad).

Atubangan hini nga mga larang han imperyalismo, gin-ayat han Makibaka an mga aada ha sektor han LGBTQ+ nga hasugon an dalan han waray pagruruha-duha nga paghahadal han panahon ngan kinabuhi para ha nasyunal demokratiko nga rebolusyon, lahos ha ira mga kalugaringon.

Kinahanglan subaron an pananglitahan han mga namartir nga Pula nga kumander ngan mangaraway han Bagong Hukbong Bayan kaupod hira Val Mante (Ka Richard), Daniel Imperial, Wanda Gumban (Ka Waquin), Kevin Castro (Ka Facio), Jo Lapira (Ka Ella), Ciela Pacaldo (Ka Alena), Jethro Isaac Ferrer (Ka Pascual), Kal Peralta (Ka Rekka), Queenie Daraman (Ka Kira), Dee Supelanas (Ka Dahlia), ngan damo nga iba pa. Kinahanglan pasidunggan an paghahadal nira han kusog, kabaltok, kaisog ngan kinabuhi para ha masa ngan magkalain-lain nga nataran han rebolusunaryo nga buruhaton. **AB**



6

kabulan nga diri makatadungan nga iginpriso hi **Tay Pruding** (Prudencio Calubid Jr) ha luyo han klaro kaupay nga ebidensya nga diri hiya hi Prudencio Calubid, konsultant ha erestorya pankamurayawan han NDFP, nga biktima han pwersahay nga pagkawara han estado hadton 2006 pa.



han *corals* ha **Paradise Reef** an namatay tungod ha konstruksyon han Samal Island-Davao City Bridge.

5 katuig han pasista nga Anti-Terror Law

227 na an gin-gipit, **34** an iginkategoriya nga "terorista," **193** an ginkasuhan, ngan **30** an iginpriso ha ilarum hini. **Unom** ha mga kaso an iginpabasura.

₱50 la an dugang nga suhol

nga gin-aprubahan han NCR *wage board* yana nga tuig, katugbang la han 0.4% ha gastos han mga kapitalista, ngan waray pa 2.5% han ira kita. **Ini nga dugang kulang hin ₱576 agud abuton an makaburuhi nga suhol.**

27%↑

la han kabug-usan nga iginhitaas ha presyo han gasolina ngan 37% la para ha *diesel* an iginrolbak tikang ha 11 kabeses nga paghitaas hini han mga kompaniya ha lana tikang Enero 1 tubtub Mayo 25, 2025.

20%↓

an iginluos han dakop nga isda ha bug-os nga nasud hadton Mayo tungod ha maraut nga panahon.

31% an iginhitaas han utang han Pilipinas, tikang ₱12.8T ngadto ha ₱16.92T, ha 3-katuig nga termino han rehimen Marcos.

12 KAADLAW

an iginlastar han agresyon han US ngan Israel kontra ha Iran, diin ginbomba han US an tulo nga mga importante nga pasilidad nukleyar para ha pangaliskay han Iran gamit an 30,000-libras nga mga bomba.



Pabug-at nga buhis ha katawhan, pagaan naman ha mga langyaw

Ha nakalabay nga mga dekada, tikabug-at an luun-luon nga buhis nga iginpapasugbong ha katawhan Pilipino, nga dugang nga nag-ludlod ha ira ha ruyonduyon han kakablasan. Ha luyo nga bahin, tikagaan an buhis nga ginsusukot ha pinakadagko nga kumprador burgesya ngan mga langyaw nga lokal nga kompaniya, nga dugang nga nagpapadako ha ginahakin nira nga tubo.

Pira kadekada na nga gin-aantos han katawhan an Value Added Tax (VAT) ha pinakabatakan nga mga produkto nga pagkaon ngan serbisyo, nga ha syahan 10% kundi ha dayuday nagin 12%. Hadton 2016, inabot ha ₱622 kabilyon an nakolekta nga VAT nga dugang pa nga dinako ha sinunod nga mga tuig. Hadton 2013, ginta-tantiya nga ginkokomponer hini an 18.9% han kabug-usan nga rebenyu (kita) han gubyrno, tikang ha himubo nga 7.9% hadton 1989. Mas bumug-at an surugbungon han katawhan han igpatuman an TRAIN Law nga nag-imponer han dugang nga *excise tax* ha mga produkto nga petrolyo, sigarilyo, makahurubog nga irimnon, magtam-is nga irimnon ngan iba pa.

Hadton Hunyo, gindugngan pa ni Marcos an surugbungon han katawhan ha pagsasabalaud han Digital Services Tax nga nag-imponer han 12% nga VAT ha mga serbisyo nga naagi ha internet. Ginlupgop han bag-o nga balaud an mga *online shopping platform* sugad han Shopee ngan Lazada, mga *website* para ha mga nagbibiling han *freelance* nga trabaho sugad han Fiver ngan Upwork, ngan *streaming platform* sugad han Netflix ngan Spotify. Susugbungon an buhis han ordinaryo nga *content creator*, *online seller*, *freelancer*, ngan mamaralit. Gintatantiya nga maganansya an rehimen US-Marcos hin ₱105 kabilyon ha masunod nga lima katuig tikang dinhi.

Antes hini, gin-obliga an mga mamaraligya ha mga *online shopping platform* nga magparehistro ha Bureau of Internal Revenue (BIR) ngan magbayad hin 1% nga buhis tikang ha ira kabug-usan nga kita. Igsusunod pa han rehimen Marcos an buhis ha


mga *single-use* o usahan nga paggamit nga mga plastik ngan buhis para ha mga nagamit han motorsiklo.

Ha luyo nga bahin, mas nagdako an kita han dagko nga lokal ngan langyaw nga kompaniya tungod ha mas ginpahimubo nga buhis nga ginsusukot ilarum han CREATE MORE Law. Tulo pa nga balaud an iginpasa hadton 2024 nga mas nag-iban ha buhis han kumprador burgesya ngan dagko nga lokal ngan langyaw nga kompaniya. Ini an mga Ease of Paying Taxes Act, Real Property Valuation and Assessment Reform Act, Capital Markets Efficiency Promotion Act, nga ngatanan kaparte han Comprehensive Tax Reform Program nga iginpatuman hadton panahon han rehimen Duterte nga iginpadyon han rehimen US-Marcos.

Ginpaboran hini nga mga balaud an mga negosyante pinaagi han mas simple nga sistema han pagbabayad han buwis, pag-iban han buhis ha kita, pag-iban ha multa ha diri nakagbayad ha tama nga oras, paghimubo han buhis ha pagpalit ngan pagbaligya han mga sosyo ngan paghatag han mga insentibo sugad han *tax holiday*, libre o himubo nga sukot ha kuryente, himubo nga buhis ha tuna, amnestiya ha pagbayad han buwis ngan iba pa.

Maabot ha ₱5.9 kabilyon nga buhis ha sakob han tulo katuig an iban ha koleksyon han reaksyunaryo nga estado ha CREATE MORE Law pala. Ha ilarum han syahan nga CREATE Law, inabot ha ₱476.8 kabilyon an igin-iban ha buhis ha dagko nga negosyante ha syahan nga lima katuig pala.

Gintatawag nga regresibo o paatras an sistema han pagpatok han



higtaas nga buhis sugad han VAT ngan *excise tax* ha mga produkto ngan serbisyo nga ginapapalit o gin-gagamit han katawhan. Ini nga mga buhis syahan nga iginpatok ha dikta han World Bank (WB) ha mga atra-sado nga nasud sugad han Pilipinas agud maseguro nga sadang an nakukolekta nga kita han nasud ngan mababaydan hini an mga langyaw nga utang. Hadton dekada 1980, kaparte ini han mga kundisyon han pautang han WB ngan International Monetary Fund (IMF). Sigon mismo ha WB, an buhis sugad han VAT an pinakamadagmit nga surok han kita han estado tungod kay makuri ini likyan ngan an mga nagbabaligya nagin tagakolekta gihap han buhis. Ha tinuod, natuod an WB nga kulang pa an VAT ngan "may wada pa" agud pahitas-on an kita ha VAT ha Pilipinas.

Ha luyo han nakukolekta nga buhis tikang ha masa nga anakbalhas ngan petiburges, guti nga porsyento la hini an nahingangadto ha pankatilingban nga serbisyo sugad han ha edukasyon ngan kalibsugan o pondo para ha agrikultura. Aada ha 20% naman han kabug-usan nga pondo han gubyrno kada tuig an nahingangadto la ha korapsyon o direktso ha bursa han mga burukrata-kapitalista. An grabe gin-gagamit pa an buhis ha papisimo han estado pinaagi han pagpalit han mga armas, pagpondo ha NTF-Elcac ngan mga pasista nga kampanya.

AB

Bagapyudal nga pananalumpigos ha mga parag-uma han utanon ha Bukidnon ngan Lanao del Sur

Usa kaektarya nga tuna o mas guti pa an kasagaran nga gin huhulad han mga kabras ngan butnga nga parag-uma ha bawnderi han Bukidnon ngan Lanao del Sur. Kaagsuban nga nagtatanim han utanon sugad han karabasa, harang, repolyo, patatas, karots, kamatis, Baguio beans, harang nga *bell pepper*, tarong ngan brokoli, ngan bisan kamote ngan mais. Luun-luon nga bagapyudal nga pananalumpigos an nahiaaguman nira, tikang ha kawayar han tuna, usura, mahal nga gastos ha produksyon tubtub ha barato nga pamaligya han produkto.

Paniniyupi ha produksyon

Tungod kay waray sadang nga puhunan, ordinaryo para ha mga parag-uma an mangutang para ha produksyon. Napailarum hira ha mga kasarabutan han pautang ha mga lokal nga "pinansyer" o usurero nga mayda matiyupion nga kaayusan ngan interes. Partikular ha mga utanan, an interes ha utang aada ha porma han bahinay ha ira kabugusan nga ani o kita.

Para ha mga parag-uma nga waray tuna, naeksister dinhi an sistema nga "meyntener." Ilarum hini, an tag-iya han tuna (nga naakto nga pinansyer) nagpapautang ha parag-uma agud tanuman an tuna nga ginpapagamit ha iya. Gin-gagamit an pautang para ha pangandam han tuna, gahi, abono, pestisidyo, herbicide ngan pagpapasuhol ha trabahador-ha-uma. Ha sugad, solo nga ginsusugbong han parag-uma an gastos ha produksyon ngan pagtatrabaho.

Dugang nga pabug-at ha parag-uma an panlibo han pira nga pinansyer ha presyo han mga *farm input* nga ginpapautang ha mga parag-uma. Ha usa nga kaso, ginpepresyuhon han pinansyer an tig- $\text{P}1,100$ nga galon han Roundup *herbicide* ha balor nga $\text{P}1,700$.

Diri panalagsa an higayon nga nalulugi an mga parag-uma han utanon kun nabagsak an presyo han panmalit han produkto o maiigo han kalamidad. Tungod dinhi, nakahigot

hira ha siklo han utro nga pag-utang ha pinansyer para ha masunod nga pananum tubtub ha hul-os nga malubong ha utang.

Paniniyupi ha pamaligya

Gindadara an produkto nga utanon han mga parag-uma ha Cagayan de Oro City, hirayo tikang ha mga tanuman. Gindadara ini ha bagsakan han utanon ha Barangay Bulua diin kaudgan igintatambak ha mga bodega han mga pinansyer-dealer o mga dealer.

Ginsusuktan an parag-uma hin $\text{P}20$ kada sako (100 kilo kada sako) ha pagdidiskarga han ira produkto ha bodega. Nagbabayad gihap hira han $\text{P}2.5\text{--P}3$ kada kilo ($\text{P}250\text{--P}300$ kada sako) komo plete ha bodega ha mga dealer o ha pira nga kaso 10% han balor han baligya ha produkto nga gulay.

Ha bagsakan, igintatalaan an presyo han mga produkto nga utanon depende ha kadamuon han suplay ngan birik han panmalit. Waray konsiderasyon an mga dealer ha gastos han mga parag-uma ha pagtatalaan han pankabugusan nga presyo. Mga dealer gihap an nagtatalaan ha suklanan han pagpepresyo depende ha kalidad han utanon. Hira gihap an nagtatalaan han presyo han pamaligya ha komersyante. Kun diri mahibabaligya han dealer an produkto, iginbabalik ini ha parag-uma.

Ha pamaligya han *bell pepper*, pananglitan, an kada kilo han *bell*

pepper nga ginpalit hin $\text{P}50$ ha parag-uma poyde ibaligya han dealer ha komersyante ha balor nga $\text{P}70$. Kun mahibabaligya niya an 5,000 kakilo ha *bell pepper*, makita an dealer hin $\text{P}15,000$ tikang ha plete ha bodega, ngan $\text{P}100,000$ ha pagbaligya hini ha komersyante. Makita hiya han gross o kabugusan nga $\text{P}115,000$, antes ibanan han pasuhol ha trabahador ngan iba pa nga gastos.

Ha gapil han parag-uma, makita la hiya han $\text{P}250,000$ ha 5,000 kakilo. Ig-iiban dinhi an gastos ha produksyon nga $\text{P}205,132.40$ ngan masasalin an $\text{P}44,867.60$. Kun sumakob hiya ha sistema nga *financing* o *maintainer*, an masasalin la ha iya $\text{P}22,433.80$.

Labot dinhi, dako an epekto ha presyo han ismagling ngan mga kartel nga nagkokontrol ngan nagma-manipula ha suplay. Dugang nga ginbubutong tipaubos an presyo han lokal nga produkto nga utanon kada nabaha an imported nga utanon nga gintutugutan han gubyrno.

Komo prodyuser han pagkaon, igin-iinsister han mga parag-uma dinhi an kaseguruhan ha gin huhulad nga tuna; makatadungan nga presyo han mga produkto ngan pagtatanggal han magkalain-lain nga pamaagi agud magin barato an pagpalit ha ira produkto. Panawagan gihap nira an makatadungan nga interes ha pautang; pagpahitaas han suhol han mga trabahador-ha-uma ngan pagpapaluros han plete ha bodega o komisyon han mga dealer.



Panmatay ha mga sibilyan ngan hors de combat, nahilista ha Masbate, Leyte ngan GenSan

Ha nakalabay nga mga semana, nahilista an lima nga biktima han pampulitika nga panmatay han mga pwersa han estado. Labot dinhi, mayda gihap mga kaso han pag-aresto, panmusil ngan pan-gigipit. Dugang ini ha luun-luon nga krimen han rehimen US-Marcos ha tulo katuig ha poder.

Ha Masbate, gin-istraping ngan napatay han mga pwersa han estado an 25-anyos nga sibilyan nga hi Joey Oas ha Barangay San Carlos, Palanas hadton Hunyo 29. Ginpagawas hiya nga "inato" ngan nakuhaan han usa nga pistola, mga magasin ngan bala. Gin-akusahan gihap hiya nga membro han *sparrow* yunit han Bagong Hukbong Bayan (BHB).

Ha Leyte, tuyo nga ginpatay han 93rd IB ngan 802nd IBde an duha nga *hors de combat* nga membro han BHB ngan usa nga medik hadton Hunyo 18 ha Barangay Cogon, Carigara. Mayda sakit ngan nagpapahuwas hadto hira Juanito Selleca Jr (Ka Tibor/Ka Rey) ngan Sadam Paclita (Ka Dimple) han salakayon ngan panmusilon han mga sundalo. Kaupod nira nga ginpatay hi Lino Delante (Ka Dodong), usa nga medik nga nag-aataman ha mga pasyente. Diri armado an tulo.

Ha General Santos City, ginpanmusil ngan napatay han diri pa nakikilala nga mga tawo hi Ali Jejhon S. Macalintal, usa nga brodkaster ha radyo, hadton Hunyo 23 ha Barangay Lagao. Hi Macalintal, usa nga *transwoman*, nagin aktibo nga kaapi han mga progresibo nga grupo tikang hadton 2002. Hadton 2024, nagreport hi Macalintal nga gin-gigipit ngan ginmonitor hiya han mga ahente han Task Force GenSan. Pira kaadlaw antes pusilon, nakakarawat hiya han mga tarhug ha iya kinabuhi.

Pag-aresto. Lima nga pankultura nga aktibista an gin-aresto han mga pwersa han estado hadton Hunyo 27 ha Barangay Pasong Buaya II, Imus, Cavite. Ha butnga han ira oplan pinta, ginsundan hira, ginpalibutan, gintarhug gamit an pusil, antes gindara ha *barangay hall*. Temporaryo hira nga nakagawas hadton Hulyo 1 ngan naatubang ha mga kaso nga *malicious mischief* ngan bandalismo.

Panmusil. Ha Negros Oriental, waray wantas nga nagpabuto han pusil an mga "trigger happy" nga sundalo han 62nd IB ha Sityo Putat, Barangay Humay-humay ha Guihulngan City hadton Hunyo 23.

Ha sinunod nga adlaw, piniritay nga ginsulod han mga sundalo an balay ni Bobby Gemodo ha Sityo Laos, Barangay Binobohan ha syudad agud gipiton hiya. Ginkadto gihap han mga sundalo an balay ni Mario Noyad ha Sityo Natae, Barangay Binalbagan, Canlaon City agud hadlukon ngan tarhugon hiya. **AB**

Tinuod nga kamurayawan, panawagan han mga tawo ha singbahan ngan iba nga sektor

GINPATUMAN HA ROME, Italy hadton Hunyo 27-28 an "Pagtatanim: Sowing Seeds of Faith Solidarity for the Filipino People's Struggle for Peace," usa nga katitirok han masobra 70 nga tinaglawas han magkalain-lain nga pagtuo ngan mga grupo ha tawhanon-nga-katungod tikang ha 13 nga nasud. Iginhimo ini atubangan han kadagmitan nga panginahanglan para ha pagkakaurlusa ha ranggo han tawo ha singbahan agud suportahan an pakigbisog han mga Pilipino para ha kamurayawan.

Nagtirok gihap an mga tinaglawas han magkalain-lain nga grupo ngan sektor ha ginhimo nga Mindanao-wide Peace Conference hadton Hunyo 24 ha Cagayan De Oro City ha pangunguna han Council of Leaders for Peace Initiatives. Panawagan nira nga suportahan an erestorya pankamurayawan giutan han GRP ngan NDFP nga mabaton ha mga gamot han armado nga pakig-away ha nasud.

Gios protesta han katawhan nga Kenyan, madarahug nga ginbungkag

MAABOT HA 16 nga raliyista an napatay ngan 400 nga iba an nasamaran han madarahug nga ginbungkag han rehimen US-Ruto han Kenya an mga protesta han katawhan hadton Hunyo 25. Kaparte an protesta han pagsalin-urog ha serye han higante nga mga demonstrasyon nga iginlansar hadton nakalabay nga tuig kontra ha neoliberal nga proposisyon nga Finance Bill 2024, nagtitikagrabe nga pandarahug han pulis ngan panmuypoy han estado.

Mahinunumduman nga napaatras han higante nga mga paggios hadton 2024 an rehimen US-Ruto ha larang nga pagimponer han magbug-at nga buhis nga dikta han International Monetary Fund (IMF) nga dugang nga nagpapakuri ha masa nga Kenyan. Agud tuso nga ilusot an mga buhis, paruparte ini nga iginpasa han parlamento han Kenya ha nakalabay nga tuig.

Iginlansar an mga paggios ha Nairobi, Mombasa, Kisii, ngan iba pa nga syudad. Dara-dara nira an bandera han Kenya ngan ginuliat han panawagan nga "Ruto Must Go" (Palayason hi Ruto) ngan "Occupy Statehouse" (Sakupon an Statehouse o urukyan ni Ruto komo pinuno han gubyrno). Dara gihap nira ha mga protesta an mga ladawan han mga namatay hadton nakalabay nga tuig ha pandarahug han pulis kontra ha demonstrasyon.

Nagpahayag han suporta ngan pakig-usa ha pakigbisog han masa nga Kenyan an International League of Peoples' Struggles Africa ngan West Asia Regional Committee. Ginaghat nira an mga Kenyan nga dugang pa nga magpursige atubangan han nagtitikagrabe nga panmuypoy.

"Tukma la nga magpadayon ha pag-oorganisa ha mga Kenyan ngan maglansar han mga panmasa nga aksyon agud ipasulong an panawagan para ha nasyunal nga katalwasan ngan demokratiko nga katungod," pahayag han komite. Sugad ha iginpakita han hiluagan nga demonstrasyon han katawhan Kenyan hadton 2024, natuod an ILPS nga maaakos nga iduso han tikadako nga paggios an rehimen Ruto nga igatras an mga dunot hini nga palisiya.